

E PARADA DI AMBIENTE Y COLORIDO

For di mainta 10 or a sinta contempla e parada di carnaval cu no ta esun oficial, sinembargo un parada inoficial teni anualmente for di 9 or di mainta pa e momento cu e desfile carnavalesco oficial cumunza paasa.

VEHICULONAN

Ta cumunza prome cu e **cantidad di auto** cu ta core pariba pabao, sperando pa cruza danan wordo spera.

Chofernan buscando cualquier 2 meter habri pa por drenta mey mey di traileran, of pa baha familiares na lugarnan unda otronan tin espacio wanta pa nan.

Jovennan tras di stuur cu ta core contempla e **"mosan"** canto di caminda, y otronan cu ta manera perdi.

Despues cu cera e cayanan, ta cumunza e **desfile di motocicletanan** di tur forma y estilo.

E mucha cu su motocicleta cu motor, coriendo cerca di su tata of mama, e jovencito den su **mini monstertruck di Bigfoot**, e teenagernan y esnan di mas edad cu ta show nan motocicleta di e marca mas barata te na esun mas caro, pero na lugar di cara dilanti, ta core cu cara na banda pa mira kende ta mira nan y si nan ta ser admira, sin importa cu nan ta causando peliger pa e centenares di hende cu ta canando riba caya.

E **jovennan riba bicicleta** cu ta core pa show con bon nan por core riba solamente e wiel patras y con nan por bini cu velocidad y para net na ora pa no dal hende riba caya.

E cantidad di muchanan cu por fin a haya un caya pa nan por core nan **Rollerblade** pero como mucha no por pensa riba e peliger cu nan mes ta causa pa nan mes y otronan, pero menos ainda cu e **"shonnan"** riba motocicleta of bicicleta.

Ora ta pasando y e participantan ta sigui desfile.

Por ehemplo e homber cu T-shirt cu ta cubri mitar di su **"barica di bari"** pero na un man un tas di Heineken y na otro man un tas di Amstel, cu su bebidanan. Tras di dje e hulandes cu **slof na pia**, carson sushi manera ta mecanico e ta y un T-shirt cu a **pasa den guerra**.

Peru na su man drechi, un **"belleza di mucha"**, bisti deportivamente cu su shorts blanco y blusa blanco netchi

y bon strika, cu su sapato hielchie halto estilo boots na pia.

DESFILE DI MODA

Ultimo simannan na Paris y New York a presenta e moda pa 1993, pero den e desfile pre-parada ayera por a mira de lo mas extravagante te lo de mas moderno.

E muchanan muher lomba afo, di tur edad riba 15 aña. Esun mas bunita ta e **"estranhera"**(?) cu lomba y barica pinta of ta cu tatoo, for di carganta pa cintura. Ta bon cu siquiera el a bisti dos **"cup"** mara cu algo manera un veter, pa tapa parti di su curpa ariba.

Otronan cu shortnan cu ta poco mas cu un bikini of tanga, **"pega den tur estrecho di oceano"** di curpa. un mas pega cu otro, y un mostrando forma dilanti of patras mihor cu e otro.

Por a mira nan di tur tamaño, **"dushi"** manera hende homber sa bisa, combina cu **"bon bala"**, **"pal'i hembra"** te na **"weita cos fastioso ey"**.

Tin di nan cu ta keda elegante y bunita cu nan shorts tight, otronan cu mucho gordura, otronan ta lifia di patras so ta ser marca debi na vet cu ta cologa manera **"triple blad"** y cu **"double tube"** di cuero ta show dilanti.

Muchanan pia bunita, pia diki, pia flaco, pia mediano, bel di celulitis, cuero na kilo pa bende, pero cada un atractivo na nan manera.

Hombenan bisti casi manera e damanan cu shortnan tight, y mostrando pianan di tur forma tambe, principalmente poco di nan cu ta barica bo ta mira despues e persona ta bin su tras. Pero e mester di su short y T-shirt, y keda deportivo na pia.

JEANS Y STRETCH

Jeans por a mira di tur sorto riba caya. Tanto cerca hende homber como hende muher.

Por a mira e **"dama"** cu e jenas color cla, helapi cu paña corra y verde, pero cosi cu hilo geel.

Tambe por a mira esun cu carson stretch preto, pero su parti dilanti y su parti patras tin jeans cosi riba dje.

Por a mira dos **"dama"** cu jenas cu buraco patras, y ta show dos **"blad"** blanquita asina. Kizas nan tabata pensando cu **"ningun hende no ta mira."**

Tin cu a bisti stretch pants cu bo ta mira **"door di curpa di e doño"** te otro banda di caminda. Mientras cu tin pida bikini corra of geel eybao, tur cos ta **"safe"**.

Otro cu mes tipo di stretch a percura pa siquiera bista shorts di jeans riba dje.

OTRO ESTILONAN

T-shirt manera custumber por mira tur sorto durante e desfile nan aki. Mucha homber y mucha muher cu T-shirt di 10 tamaño mas grandi cu nan mes tamaño, te na damas y caballero cu tamañonan cu ta pega mas tanto posibel na nan curpa, pa show bunitexa di parti dilanti di curpa.

Por a mira T-shirt corta pa ta net riba lombrishi, y otronan corta pa ta net bao di pecho.

Por a goza di T-shirt cu tabata parece cu ta manga so nan tin pasobra tur e resto ta na strepi y cu bao di dje 2 **"cup di ijscream"** pa tapa bunitexa.

Cerca e hombernan a menciona caba esnan cu aunke con grandi e T-shirt ta, ta mitar barica so nan ta tapa. Tin hombernan cu **"body"** di Mr. Univer cu T-shirt corta y cosi special pa muestra su forman. Pero por a nota tambe T-shirtnan **"invisible"** cerca hombernan cu tabata cana lomba afo, barica afo, pa muestra mucha muhernan con bon forma nan ta, of con bunita e tattoo riba pecho of lomba ta pinta.

Di modanan di carnaval por skirbi un buki si continua cu esaki.

OTRO BISTANAN

Den e otro bistanan por a mira con damanan ta cana brasa cu otro, te tene man di otro, sunchi otro, mescos cu por a mira hende homber ta cana brasa cu, tene man cu otro, pero menos sunchi otro.

Xiorelis cu a los pia riba cada roadmarch cu a pega, lechie netchi bisti cu su trahe di corant imprimi, cu su ceurez na man moviendo heup a la teenager di robez pa drechi riba cada soca.

Por a goza di Xiomara cu hasta papel di WC den man ta zwaai riba **"show me the towel"**, y pa no lubida Carolina cu a los laga bay manera ta riba otro mundo e ta, bailando su **"Tira awa"**.

Por a goza di e haitinanan bendiendo nan **"Tentalaria, cocada, pinda y coi lechi"**

tur netchi lora den waxpaper. Otro haitinanan y haitianonan cu nan petchinan na decenas riba otro tur rond di curpa y bo ta puntra si nan ta bende of no.

Por a mira por ehemplo esnan menciona awor ey, **Xiomara, Ietchi, Xiorelis y Carolina**, cu joyanan brillando na carganta, cadena y hanger bunita, otro cu perlanan, renchi oreo lombrando cu cada rayo di solo, renchi di diamante y perla na cada dede di man, y armband na tres te cinco batiendo na nan pols.


Si no ta un joyeria a perde esakinan diasabra anochi, ta fantasia tur lo mester tabata, pa show asina na grandi.

Asina tabata tin miles di dama ta cana rond, pero no por lubida e **"caballeronan"** cu nan renchinan lombrante na oreo tampoco.

Pa no haci e relato mucho largo, lagami termina na e propietarioan di cacho, cu a shownan cachonan di raza, limpi y obediente y mamanan cu a cana cu nan yiu na **"cadena"** pa nan no perde.

Tur e posible exageracionnan di e relato aki ta pa e alegria y humor carnavalesco. Mi ta spera di no a trapa lektor di ningun hende. Hopi ta en broma.

Ciaocito Hucona.



Tanto WC publico cu tabata tin y "shon" aki no a mira ningun ?

